



**POLELO EA MOHLOMPHEHI TONAKHOLO
MABAPI LE HO EKETSA HO KHINOA HOA
MESEBETSI E TLOAELEHILENG LE MOTSAMAO
(EXTENSION OF NATIONWIDE LOCKDOWN)**

21 `MESA 2020

Basotho baheso,

Kajeno re qeta matsatsi a mashome a mabeli a motso o mong (21 days) Naha ea Lesotho e khinne lits'ebeletso tse tloaelehileng le motsamao oa sechaba ka kakaretso ho entsoeng tlasa maemo a qomatsi ao ke ileng ka a phatlalatsa se 'Muso ka la 18 Thlakubele, 2020. Ke nka monyetla ona ho leboha sechaba ka ho ikobela molao le ho lula malapeng joaloka ha se ile sa laeloa ho etsa joalo.

Mehato ena e reretsoe ho sireletsa sechaba sa Basotho le bohole ba phelang naheng ena, khahlanong le ts'oaetso ea lefu la COVID-19 le ammeng lefats'e ka

bopphara. Ho fihlela kajeno ha ke buoa le lona, lefats'e le se le na le batho ba ka holimo ho Limilone tse peli ba netefalitsoeng ba na le lefu la COVID-19, 'me ka bomalimabe, ba ka holimo ho Lekholo la likete, ba se ba lahlehetsoe ke maphelo. Leha hole joalo, ke bonyane batho ba ka holimo ho Makholo a likete tse ts'eletseng ba hlapohetsoeng e leng se re fang ts'epo hore ha sechaba se ts'oarane ka matsoho se ka fenya Kholumo-lumo ena.

Sechaba sa heso,

Le tla hopola hore lefu lena le ts'oaetsana ka marotholi
a tlohang ho motho ho ea ho e mong le ho ts'oara lintho
tse nang le kokoana-hloko ena. Kahona sechaba sa heso
'Muso o ile oa fumana ho le molemo ho thibela
menyetla ea ts'oaetso ka ho fokotsa metsamao le ho
kopana hoa batho ka bongata.

Letsatsing la kajeno, ka boeletsi ba setsi se eteletseng
pele toants'o ea kokoana-hloko ea COVID-19 (**National
Emergency Command Centre**), 'Muso oa Lesotho o
entse qeto ea ho eketsa ho khinoa hoa lits'ebeletso tse

tloaelehileng le motsamao oa sechaba ka kakaretso ho filhlela ka la **5 Mots'eanong 2020.**

Ka lehlohonolo, Morena Molimo o sa re sirelelitse re le Naha ea Lesotho khahlanong le ts'oaetso ea kokoana-hloko ena. Le ha hole joalo, re ntse re le kotsing e kholo ea hore lefu lena le kaba teng ho latela mokhoa oo kokoana-hloko ena e fetang ka ona. Re le 'Muso oa Lesotho, re etse hloko hore lipalo-palo tsa ts'oaetso li ntse li nyoloha ka sekhahla linaheng tse ngata tsa lefats'e ka ho khetholoha naheng ea boahelani ea Afrika Boroa. Re thoholetsa ke hona mekutu eo na ha ea Afrika

Boroa e ntseng e e etsa ho loants'a seo a sena, 'me rea ba khotatsa ke hona.

Maobane ka Mantaha oa la 20 'Mesa, re bile le Moromuo ea khetheleng oa President Ramaphosa (Special Envoy), Letona la mehleng ofising ea President Jeff Radebe. Phuthehong ena e atlehileng haholo, re lumellane ka ts'ebelisano 'moho e le ho kopanya litheko le ho thakelana ka malebela lipakeng tsa linaha tse peli toants'ong ea lefu lena ka ha matlo ho cha! mabapi.

Basotho baheso,

Nakong ena e ekelitsoeng, 'Muso oa Lesotho o tla tsoela-pele ho sireletsa Naha khahlanong le lefu lena ka ho kenya ts'ebetsong mehato e latelang:

1. Ho akofisa matlafatso ea litsi tsa bophelo ka thepa e khetheleng (**specialized equipment such as oxygen ventilators, patient monitors and PPEs**).
2. Ho phethela khiro e seng e qalile ea lingaka le baoki ele ho tlatsetsa moo likhaello li leng teng.
3. Ho qala lets'olo le matla la ho hlahlobela sechaba ts'oaetso ea kokoana-hloko ena. Sena se tla etsoa litsing tsa kokelo (**clinics and hospitals**) le

libakeng tse khetheleng tse ka behang naha
tlokotsing ea ho nama hoa lefu lena (**screening**

and testing of high risk population areas).

Libaka tsena li tla hloauoa ka botataisi ba Lekala la
Bophelo.

4. Ho matlafatsa khokahano ea 'Muso o moholo le
Puso ea Libaka toants'ong ea lefu lena ka ho ba
hlomella ka litsebo le lisebelisoa.

5. Ho kenya ts'ebetsong meralo e reretsoeng ho
sireletsa sechaba khahlanong le ho nyotobela hoa
moruo oa Naha, le ho khahlametsa bohle ba
tlokotsing ka lebaka la ho khinoa hoa lits'ebeletso le

motsamao. Hona ho tla kenyeltsa le Basotho ba kantle ho Naha.

Re le `Muso, re boela re ipiletsa ho lona sechaba hoba le mamello ea ho ikobela lipehelo tsohle tse tla hlaha kahare ho molao o kenyang phatlalatso ena ts'ebetsong (**Government Gazette**). Sena se tla kenyeltsa ho eketsa lenane la likhoebo tse tla buloa, 'me 'Muso o tla tsoelapele ho hlahloba maemo letsatsi le letsatsi ka sepheo sa ho etsa liphetoho moo ho hlokahalang, e ntse e le ho matlafatsa ts'ireletseho ea maphelo a Basotho khahlanong le lefu lena.

Litsi tsohle tsa 'Muso re kenyelletsä le tsa ts'ireletso li tla tsoelapele ho netefatsa hore lipehelo tsa molao lia lateloa ke bohle nakong ena. Ke ipiletsa ke hona hore hobe le ts'ebelisano 'moho le sechaba ka linako tsohle, ele ho qoba khohlano lipakeng tsa lona le litsi tseo. Re boela re mema baetapele bohle ba sechaba ho ts'oarana ka matsoho le 'Muso ho tataisa le ho thusa sechaba nakong ena e thata ka thuto ea polokeho le bohloeki, ho hlapa matsoho ka sesepa ka metsi a phallang le ho ikobela molao. Hopolang he sechaba sa heso hore le nakong ena e thata, re nne re sireletse ba fokolang le ho nena tlhekefetso ka mefuta ea eona eohle le lintoa, ekasitana le lipolaeano.

Ha re hopoleng Basotho baheso hore ho ipaballa ho molemo ho feta setlhare, etsoe ea bohlale o ithuta ka mehla. Ha re `neng re hopoleng ho rapela letsatsi le leng le le leng ka hora ea leshome le metso e 'meli mots'eare (12noon) ele ho rapella pholoho ea rona ekasitana le ea lefats'e.

KHOTSO! PULA! NALA!